

Trais regiuns pli povras en noss chantun

Svilup allegraivel tar las finanzas da las vischnancas grischunas

DA GION NUTEGN STGIER / ANR

■ In trend positiv han las vischnancas da noss chantun betg be gî tar las finanzas, mabain er tar il pe da taglia. Las vischnancas hajan en maun lur finanzas, ha ditg ier **Martin Schmid**, il president da la regenza e schef dal departament da finanzas e vischnancas.

La statistica da las finanzas da las vischnancas mussa dapi intgins onns ina tendenza positiva tar las finanzas da las vischnancas grischunas. Ils indicaturs 2009 da tut las vischnancas preschentan tut en tut in maletg solid ed allegraivel, ha ditg ier *Thomas Kollegger*, il manader da l'uffizi da vischnancas a chaschun da la conferenza da medias. En ina cumparegliaziun generala sa mussia che las vischnancas grischunas impundian lur daders cun responsabladad e ch'ellas hajan en maun lur finanzas, s'allegra il president da la regenza e schef dal departament da finanzas e vischnancas, *Martin Schmid*. Las vischnancas hajan ina basa finanziaria sauna e sajan perquai preparadas per las sfidas futuras. Las vischnancas valan sco partenarias fitg fidadas cun ina gronda impurtanza per l'economia publica.

Differenzas da regiun a regiun

Ils indicaturs 2009 da tut las vischnancas han puspè mussà tut en tut in maletg solid da la situaziun finanziaria ch'è in tras l'auter allegraivel. La facultad disponibla per abitanta u per abitant è creschida anc ina giada levamain, numadamain da 323 francs (2008) a 449 francs (2009). Per cumparegliar: l'onn 2000 avevan las vischnancas anc en media in debit net da 2255 francs per abitant. Da vischnanca a vischnanca èn naturalmain las differenzas fitg vastas. Il 2000 avevan per exempel 95 vischnan-



Tar ina regiun nua che la facultad per abitant è sa reducida ferm dapi il 2000 tutga il Grischun central. Qua vista dal Piz Scalottas sin la Tumliastga dadains.

FOTO G. N. STGIER

cas nagin debit per abitant ed il 2009 eran quai perfin 115 vischnancas. *Thomas Kollegger* ha ditg che oz hajan 60% da las 178 vischnancas nagins debits. Er tar regiun a regiun è il svilup da la facultad netta e dal debit net per abitant fitg vast. En Engiadin'Ota era il debit per abitant il 2000 anc 1579 francs e nov onns pli tard il 2009 è quella summa sa midada tar ina facultad per abitant da 11 172 francs. En la Mesolcina per exempel è il debit per abitant s'augmentà da 3343 francs sin 5572 francs. Tar diesch da las 13 regiuns è la situaziun pertutgant la facultad per abitant sa meglierada, dentant èn las regiuns

Tavau, Grischun central e Mesolcina è quella vegnida mendra.

En media 3480 francs taglia communal

Las entradas da las taglias communalas èn s'augmentadas dal 2000 fin il 2009 per 33%. «Dapi il 2007 avain nus dentant constatà ina leva sminuziun tar l'entrada da las taglias», ha ditg *Armin Blumenthal* da l'uffizi da vischnancas. Dapi il 2000 fin il 2009 hajan gist 74 vischnancas reduci il pe da taglia, dentant che 44 vischnancas hajan dulzà quel. 11 regiuns hajan reduci il pe da taglia e las regiuns Tavau e Grischun central hajan registrà

in augment, è vegnì ditg ier a Cuir. En Val Müstair per exempel era il pe da taglia il 2000 anc 130% ed il 2009 be pli 120%. En media ha ina persuna pajà en il Grischun il 2000 taglia communal per ina summa da 2617 francs ed il 2009 èn quai stads 3745 francs. L'augment tar las taglias communalas ha er gî ina consequenza sin las expensas da las vischnancas. Dapi il 2000 èn quellas gist s'augmentadas per 19%. Cun dapli entradas hajan las vischnancas er la pusavladad da dar or dapli, ha ditg il president da la regenza *Martin Schmid* e schef dal departament da finanzas e vischnancas.